

orang-orang Melayu iaitu sekadar cukup hidup sedang segala peluang-peluang yang besar-besar yang boleh menjadikan perusahaan-perusahaan perseorangan atau beramai-ramai mendapat kemajuan, tidak akan diharap daripada bantuan-bantuan dan sokongan-sokongan kerajaan. Kerajaan seolah-olah membiarkan segala yang boleh didapati oleh orang-orang Melayu terdapat oleh lain-lain bangsa yang ekonominya sememangnya kuat. Keadaan yang seperti ini, yakni dengan membiarkan peluang, hanya didapat oleh orang-orang yang bukan Melayu, adalah seperkara yang sangat-sangat didukacitakan.

### **Pensyarah-pensyarah Dari Indonesia**

Semenjak daripada beberapa lama dahulu banyak pensyarah-pensyarah agama dari Indonesia yang singgah di sini memberi syarahan-syarahannya kepada masyarakat Singapura dan Persekutuan Tanah Melayu.

Kedatangan mereka di sini disambut dan diraikan dengan sewajarnya oleh umat Islam di Singapura dan Persekutuan Tanah Melayu. Banyak fikiran-fikiran dan pendapat pensyarah-pensyarah itu yang disambut dan diterima serta seterusnya adalah kedatangan mereka mengikat lagi mahabbah di antara Indonesia dengan orang-orang di Semenanjung Tanah Melayu ini terutamanya apabila mereka menganjurkan persatuan dan persaudaraan di antara umat Islam di sini.

Tujuan-tujuan yang serupa ini sememangnya disambut dan dihargakan. Hal ini adalah berjalan beberapa lamanya dengan baik. Nama-nama Hamka, Arsyad Talib Lubis, Hasbi al-Siddiqi, Nasruddin Latif, Salleh Suwaidi, Zainal Arifin Datuk, Masdad, Fathullah Harun dan lain-lain adalah dikenal ramai dan syarahan-syarahan mereka dahulu adalah sangat diperkenani.


Kemudian di antara mereka itu telah ada pula yang berulang-ulang datang memberi syarahan di sini seperti Masdad

dan Fathullah Harun. Dahulunya kedua-dua pensyarah dari Nahdatul Ulama' ini selalunya menganjurkan persatuan di antara umat Islam di sini tetapi dalam masa lawatannya yang akhir ini sangat-sangat didukacitakan bahawa telah banyak disampaikan kepada kita bahawa kedatangan mereka sekali ini adalah banyak menghidupkan perkara-perkara pertelingkahan khilafiah. Ringkasnya kedatangan mereka tidak lagi mencari jalan untuk menasihati supaya ada persatuan dan memberi fahaman tentang luasnya pengertian beragama tetapi mereka rupanya menghidupkan semula semangat perpecahan yang diterbitkan oleh fahaman itu.

Kalau syarahan-syarahan yang bersifat demikian ini dibawa oleh mereka, ertinya kedatangan mereka menjarakkan atau untuk menghancurkan keadaan yang telah retak maka tidaklah ada gunanya kedatangan mereka bahkan sifat yang sedemikian ini sepatutnya mesti ditahan. Pensyarah yang datang dari luar untuk menimbulkan dan menghidupkan lebih besar di dalam perpecahan umat Islam sepatutnya tidaklah seyogianya diberi tempat dan diberi peluang datang ke mari. Apa pula sifat-sifat kedatangan itu ada tujuan-tujuan mencari faedah di belakangnya.

Pensyarah-pensyarah agama yang kita kehendaki datang ke tanah air kita ini mestilah daripada orang-orang yang menghidupkan semangat ukhuwah Islamiyyah – semangat persatuan semangat kasih sayang, semangat ruhamā' baynahum – bukan pensyarah-pensyarah yang menghidupkan *tafarruq* dan *tanāzu* (perpecahan dan persengketaan) seperti yang dibuat oleh kedua-dua pensyarah yang baharu datang (yang berkali-kali datang ke mari) sama ada diminta atau tidak oleh orang-orang di sini.

Kalau sekiranya pensyarah-pensyarah Indonesia itu datang ke mari hanya untuk menghidupkan perpecahan maka lebih



*Presiden India, Dr. Rajendra Prasad, yang telah melawat Persekutuan Tanah Melayu baharu-baharu ini, kelihatan sedang beramah tamah dengan Duli Yang Maha Mulia Sultan Selangor dan Tengku Ampuan Selangor di Istana Negara. Cenderamata dari dif Agong yang terdiri daripada barang-barang buatan India yang indah-indah dan 20 buah buku karangannya, telah dibalas dengan cenderamata dari barang-barang Tanah Melayu yang indah-indah buatannya. (lihat gambar-gambar di muka tengah).*

baik mereka jangan datang ke mari. Memadai bagi mereka menghidupkan perpecahan di tanah airnya sendiri kerana pengalaman-pengalaman perbuatan mereka di Indonesia telah banyak diketahui di dalam mana masih boleh dibuat untuk menambat hati rakyat dengan menggunakan serban dan tasbih kerana tujuan sesuatu muslihat walaupun dahulunya mereka dilihat berpentelon dan ber-necktie yang kerana tujuan-tujuan yang lain diharamkan pula oleh mereka.

Pihak yang mempersilakan mereka datang ke mari. Orang-orang yang mempersilakan ini wajib memberi ingat dan memberi bahan-bahan yang perlu untuk disyarahkan mereka supaya syarahannya membawa kasih sayang di antara umat Islam sesama Islam, tegasnya perdiriannya – tidak menjadi orang-orang *mudhabdhib* atau orang-orang yang menghidupkan semangat *tanāzu dan tafarruq*.

Hal yang tersebut ini mustahak diperhati oleh